

Su contu de Tiu Juann'Antoni Pala e de Tia Mariantonia Pinna (nota "Tia Mariantonia Rassa").

In s'istiu in sa carrela de Santu Ainzu, in su ighinau accanta a domo de mammai, si accustumiada a bessire a friscurare, e homines, feminas e pizzoccheddos, ognunu cun s'iscannu su, si sezziana in fora e passiana ora narande contos e contigheddos..... E su biadu de Tiu Juann'Antoni Pala, nos iada nau unu contu de cando fudi andau cun sa pobidda a Oristanis po' fae missiones. Issa Tia Mariantonia Rassa, cheriada andare in Tassì, o cun Lenardu o cun Maureddu, e issu po' risparmiare cheriada andare in trenu, e in trenu suni andaoso. Partini in trenu de Abbasanta e si che suni ormios tottu ar duos, e cando su trenu este arribau a Casteddu, su bigliettaiu dd'ha toccau sa pala, e dd'ha nau: " O su ziu, scidessindi !!! A Casteddu seusu arribausu, si scende!!!" E Tiu Juann'Antoni, mesu indromiscau, dd'ha nau, ma Jeo seo andande a Oristanis, e su bigliettaiu dd'ha rispostu: " de un'oriscedda ci ddeusu passau Aristanisi". E Tiu Pala, calmu ..calmu.. .dd'ha nau: " e noada a torrare a furriare a conch'inartu". Sa risposta de su bigliettaiu " Sissidi su ziu, ma chi abarrada sezziu innoi, partidi crasi a mangianu chizzi". " Assora aspettamos, beru Mariantonia". " Itta aspettada a crasi a mangianu, innoi non podidi abarrai, custa lettorina faidi cappolinea". " Itte chere narrere capolinea Mariantonia", " dd'ada a ischere sa mazza sua"

" O Sa Zia, sa mazza dd'a portada fustetti....., no deisi ancora cumprendiu, ca nndì teffeisi cabai de custa lettorina, torrai a fai is billettus, e fra un'oriscedda torrada a parti conca assusu su ciuff.. ciuff.-.-. e non si torridi a dromì chi nou non c'imbattidi mancu crasi ad Aristanisi". Commente si che funi calande, Tia Mariantonia Rassa, este abarrada incastrada in su sedile de su trenu, e non resurtiada, né a sicchè pesare e né a ch'essire . E su bigliettaiu dd'ha nau: " O Sa Zia, e immoi commenti feusu a dd'ha spostai, deu seu unu scheletrinu, e su pobiddu e tottu sciancau, m'ada a toccai ad azzirriai una grù pò dd'a spostai, tantu pesara... dus grammusu". Faene sos billetes, e aspettano su ciuff..ciuff... su trenu chi andiada a crabone, e torrana a partire conca a Oristanis. Appena partios, este passau su bigliettaiu, po' buccare sos billetes, e Tiu Juann'Antoni dd'ha preguntau, inue frimada custu trenu, e su bigliettaiu dd'ha rispostu: " e itta ndì sciu, a innui teffidi andai fusteti? " " noisi fumisi andande a Oristanis e che semmos fertos a Casteddu, cà mi chè seo ormiu, jeo e pobidda mia puru", " custu trenu frimara ad Aristanisi, e fai cappolinea a Macumeri", dd'ha ringraziu, e s'este rivoltu a sa pobidda: " intende, intende Mariantonia, ha nau ca frimada in Oristanis, e si nocche torramos a dromire, male chi andada, frimada in tottu a Macumere".

Si suni postos a faeddare, po' passare ora e po' abbarrare ischidos, e appustis, non pare beru, si che suni torraos a indromiscare, e che suni fertos a s'istazione di Macumere.

Commente chè suni calaoso de su trenu, Tiu Juann'Antoni, dd'ha nau: " e como Mariantonia, commente faimos a ch'imbattere a bidda" e sa risposta este istada custa: " Juann'Antoni, jeo commo mi pigo su tassì, e Tue si cheresse risparmiare zuccadidda a pè", " cà si miasa postu in mente de prima, a cust'ora iammos tentu sas missiones fattasa, e non fumis pistaos.. sbatti.. sbatti.. de unu logu a s'atteru che farina in sedazzu".

E po' non ponnere in mente a mimmi, cà cheriasa risparmiare su Taxi, semos galu innoghe, né missiones fattasa, a brente boida, amos fattu in tottu sa die, s'anda e torra a Casteddu.... malamente m'asa a torrare a furcare un'attera orta...